



中國方志叢書·華北地方·第四六二號

據

清·洪亮吉、陸繼尋等纂  
乾隆五十二年刊本

影印

河南省

# 登封縣志

(二)

成文出版社有限公司印行

登封縣志卷十二

太常寺博士洪亮吉

同纂

登封縣知縣陸繼萼

伽藍記

附道

漢法王寺

傳梅嵩書漢靈帝十四年嵩山建大法王寺魏  
明帝青龍二年更名護國寺晉惠帝永康元年於護  
國寺左建法華寺隋文帝仁壽二年建舍利塔更名  
舍利寺唐太宗貞觀三年更名功德寺開元時更名  
御容寺大歷間更名法王寺後唐時因廢壞之餘分  
爲五院仍歷代護國法華舍利功德御容舊稱河南

府志法王寺佛殿前石池文許紫金蓮開中秋一月  
云生公說法時從地湧也往往他移卽萎亦神異矣  
舊志在縣北十里玉柱峰右漢永平間建宋仁宗賜  
名東都大法王寺元明仍之寺左有峽爲嵩門待旦  
處殿前石堦有金蓮花相傳二祖說法地湧金蓮卽  
其地也背負嵩岑合抱如倚俯瞰二熊諸山排列如  
拱當爲嵩高第一勝處

後魏間居寺

伽藍記嵩高中有間居寺

嵩書間居寺故元魏宣武帝離宮建於永平年詔  
亮與僧暹河南尹甄琛視形勝處創興焉

唐李邕嵩嶽寺碑嵩嶽寺者後魏孝明帝離宮正  
元年勝間居寺隋仁壽一載改嵩嶽寺十五層塔者  
後魏之所立也發地四鋪而聳陵空八相而圓方丈  
十二戶牖數百其東七佛殿者曩時之鳳陽殿也其  
西定光佛堂者瑞像之冥止昔有石像故見應身浮  
於河達於洛其南古塔者隋仁壽二年置舍利於臺  
嶽焉後有無量壽殿者諸師禮懺誦念之場則天太  
后護送鎮國金銅像置焉迢遙樓者魏主之所構也  
食堂前古鐵鐘者重千觔函二十石正光年中寺僧  
之所造也西方禪院魏八極殿之餘址也南有輔山  
者古之靈臺也中宗詔於其頂爲大通秀禪師造十

級浮圖

河南府志間居在法王寺西里許俱在今太室南麓  
北史稱馮亮雅愛山水又兼工思造間居佛寺林泉  
旣奇營製又美曲盡山居之妙又高僧傳曰唐永寧  
時嵩嶽間居寺釋元珪廬嶽之荒塢一日偉丈夫從  
部曲來謁曰我此嶽神也珪曰東嶽寺之障莽然無  
樹北岫有之而背非屏擁神能移北樹於東嶺乎神  
曰聞命幸無駭是夜暴風吼雷物不安所詰旦和霽  
則北嶽松柏盡移東嶺其地今會善西戒壇是也  
舊志後魏於寺立十五層塔中宗造十三層浮圖又  
有逍遙樓今惟一塔一殿二三殘碑而已然其形勢

絕勝可與法王相頡頏云

後魏道場寺

伽藍記嵩高中有道場寺

北史馮亮傳延昌二年疾篤宣武勅以馬輿送令還山居嵩高道場寺

河南府志道場寺今不可考馮亮嘗嘗間居寺後退居道場寺則二寺當相近或以爲實一寺者非也

後魏嵩陽寺

伽藍記嵩高中有嵩陽寺

魏嵩陽寺碑大德生禪師以此山先來未有塔廟禪師將欲接引四生卜茲福地創立神場北背高峰南

臨廣陌西帶濬澗東接修林於太和八年歲次甲子  
創造伽藍築立塔殿

河南府志嵩陽寺碑東觀天平二年刻石碑末書唐  
麟德元年從嵩陽觀移會善寺蓋寺自隋大業已改  
爲觀唐營奉天宮至五代周改道院爲書院宋時稱  
盛至今不改仍存嵩陽之名非復寺觀之舊其事遂  
千古矣

後魏中頂三寺

伽藍記嵩高上有中頂寺東有昇道寺栴檀寺

河南府志中頂昇道栴檀在嵩頂上伽藍記有兩栴  
檀寺一在山上二在山下皆不可確指五代晉有

極寺疑卽後魏中頂寺也晉賜峻極額時並建峻極  
中院峻極下院中院在今二郎觀西有廢址下院在  
今登封西關二院皆得曰峻極寺宋司馬公題名峻  
極寺壁上實峻極中院也

舊志峻極寺有三院上院在嵩頂中院在嵩麓俱廢  
下院在西關五代晉周間建明萬歷邑紳焦子春倡  
衆重修爲講經所康熙十七年大燬火

### 後魏少林寺

唐裴濯寺碑少林寺者後魏孝文所立也沙門跋  
自西域來太和中詔有司於此寺處之淨供法水  
給公府廼於寺西臺造金木寺後造翻經臺周建

德中廢毀大象中於兩京各立一寺因孝思所置以  
陟岵爲名洛中陟岵卽此寺也隋開皇中詔柏谷塢  
屯地一百頃賜少林寺太宗賜地四十頃水碾一具  
武德中寺有白雀見貞觀中白雀復瑞咸亨中御飛  
白書題金寺波若碑永淳中御札又飛白書一飛字  
題寺壁齋拱中有冬竹抽笋塔院後復有藤生  
名勝志寺在少室山北麓有初祖菴梁武帝時達磨  
於此面壁九年有照影石云達磨現影其中

河南府志韻府引畫禪迦佛陀禪師天竺人至隋文  
帝嵩山起少林寺至今房門上有畫神卽是迦佛陀  
之迹據袁淮碑寺立於後魏孝文而畫禪以爲起於

隋者蓋寺毀於周隋開皇中復立爲少林寺也

舊志在縣西北二十五里五乳峰下前對少室如翠屏端立形勢絕佳魏書曰跋陀自西來有道業深爲孝文所敬詔於少室山陰立少林寺以居之與裴灌碑說異寺有緊那羅殿明初建有廓然堂明萬歷間巡撫都御史蔡汝楠建最後爲藏經閣卽毘盧閣一名千佛閣明慈聖太后撤伊王府殿材鑿山爲基於萬歷戊子建雍正十三年奉

勅重修

後魏明練寺

釋靖彰永泰寺碑寺創自後魏正光二載孝明帝之

妹入道爲尼敕爲置明練寺兼度士庶女等唐貞觀  
三載議尼寺居山恐人侵擾敕令移額於偃師縣下  
置此因廢焉神龍二載有嵩嶽寺僧道瑩請爲永泰  
公主置寺以永泰爲名

舊志寺在縣西二十里太室右後魏正光二年孝明  
帝之妹出家爲尼勅爲置此本名明練寺唐神龍二  
年追薦故永泰公主改名永泰寺寺後有萬公谷谷  
中有太子池

### 後魏雙林寺

釋氏通鑑傳大士問嵩頭陀修道之地嵩指崧山雙  
椿樹卽今雙林寺也

景曰珍說嵩後魏有雙林寺善會大士倚雙檟樹夜則行道晝則力作翔雙林以居

### 北齊碑樓寺

寺碑北齊天保八年丁丑立

河南府志寺在登封東四十里石涼東原上內有豫州劉刺史碑今其地名劉碑

### 北齊在孫寺

寺碑大齊河清三年歲在甲甲敬造

河南府志寺在登封東四十里蔣莊有碑

### 北齊龍華寺

河南府志告成測影臺左有龍華寺齊武平元年創

建

隋會善寺

嵩書寺本魏孝文帝離宮也魏亡爲澄覺禪師精舍  
隋開皇中賜名會善寺

唐陸長源嵩山會善寺戒壇記嵩高得天下之中也  
所謂名山福地異人靈跡往往而有漢晉間高僧植  
貝多子於西峰一年三花因爲浮圖遂爲寰中之真  
境又有兩阜中斷豁爲石門飛瀑縈回以噴薄喬木  
森疎以布護先是有高僧元同律師一行禪師鑿林  
崖之歆傾填乳竇之竊窬甃玉立殿結瓊構廊施檀  
爲香林琉璃爲寶地遂置五佛正思惟戒壇思惟者

以佛在貝多樹下思惟因名貝多爲思惟卽三花之  
義在此自河洛烟塵塏廟崩褫上都安國寺臨壇大  
德乘如修慈業廣秉律道尊志度有緣法庇羣動慨  
茲堙墜遂爲聞徹尋有詔申命安國寺上座藏用聖  
善寺大德行嚴會善寺大德靈珍惠海等住特每年  
建方等道塲四時講律藏用上人逸躅徧尋高情獨  
邁美殿塏之巖厲賞泉石之勝絕其跡不朽其教益  
宏於是鐘梵相聞幡蓋交蔭豈獨廬峰名嶽空記遠  
公之行沃洲精舍重述道林之跡時貞元十一祀龍  
集乙亥大火西流之月也

文苑英華

河南府志會善寺嘗無水唐時高僧晏公講經於此

龍變作人來聽晏公向龍乞水龍贈以泉自殿右宛  
轉流及山門而沒止供寺汲不資灌溉亦異事也寺  
在太室西南積翠峰下

舊志寺西有戒壇院琉璃壇乃嶽神受戒於元珪禪  
師處寺右一泉流至山門而止僅供寺汲稱爲龍贈  
泉

### 唐盧巖寺

河南通志寺在登封縣東北卽唐諫議盧鴻隱居之  
處開元中改爲寺

河南府志按唐書鴻拜諫議大夫固辭還山賜隱居  
服營草堂恩禮殊渥鴻到山中廣學廬聚徒至五百

人所居室自號寧極既卒子不敢居乃改爲寺又有  
下盧巖寺與盧巖相近

舊志寺在縣東北十五里踰嶺渡澗峰巒環繞寺後  
有瀑布泉相傳盧鴻故居其南三里平坡之上爲下  
盧巖寺

### 唐中嶽寺

唐書元膺發兵圍李師道設重購以捕賊獲其渠魁  
按驗乃中嶽寺僧圓淨爲師道買田伊闕陸渾山間  
以舍山中趨勇而衣食之俗謂之山棚是也捕獲伏  
誅

河南府志寺在嵩山神蓋峰下卽寶林院也